



E Berhardus ex illustri familia baronū à Vual-
purg originem habuit. Eum parentes à tene-
ris annis omnis generis uirtutibus & optimis stu-
dijs imbuedum curarunt. Erat enim egregia in-
dole & fœlici ingenio præditus. Itaq; factum ut e-
ruditione & pietate magnum sibi nomen compa-
rarit. Cum itaque eo tempore Heinricus Con-
stantiensis præsul obijsset, Eberhardus omnium
canonicorum electione in eius locum Episcopus
constitutus fuit, Anno Christi nativitatis millesi-
mo ducentesimo quadragesimo octavo. Itaq; ip-
se suam conditionem considerans, totius gregis
forma extitit. Nam ijs horis quibus in templo cō-
ueniebatur, semper primus accessit, & ultimus abiit. Domi etiam suo exem-
plu omnes ad sobrietatem & literarum studia excitauit. Interea tamen reddi-
tus Ecclesiæ mirifice auxit, & plurimos adiacentes pagos emit, atq; suæ Ec-
clesiæ adiecit. Tandem anno administrationis suæ uicesimo sexto magno o-
mnium luctu obiit, & in sua Ecclesia sepultus quiescit. Anonim. in Episco-
pis Constantien.